

ALAHADY FAHA 25 MANDAVANTAONA - A



NY FIHEVITR'ANDRIAMANITRA TSY FIHEVITSIKA

Ry Kristianina havana, amin'izao Alahady faha 25 mandavantaona, Alahady mamarana ny volana septambra izao dia asain'ny Eglizy isika hibanjina manokana ny anjara toeran'ny lahika eo anivon'ny fiainana andavanandro, Alahady antsoina hoe andron'ny lahika. Marina fa andron'ny lahika ny andro rehetra fa tian'ny eglizy asongadina handalinana sy handinihana ny anjara toerany androany izany

hoe ny maha apôstôoly ny lahika eo anivon'izao tontolo izao.

Ny lahika dia ireo miaina eo anivon'izao tontolo izao, amin'ny alalan'ny fiainany no anambarany ny vaovao mahafaly ka hitondrany ny toe-panahy maha Kristianina araka ny vavakantsika momba ny fiantson'Andriamanitra. Mivavaka isika androany ny hiveloman'ny lahika lehilahy sy vehivavy

rehetra dia mba hiainany ny toe-panahy maha lahika zany ary ao anatin'ny tolagna toko telo izany andraikitra izany izany hoe miaraka ny lahika ny pretra ary ny relijiozy. Matetika aho no milaza amintsika ao amin'Andriamanitra tsy misy kisendrasendra fa asehony amintsika ny sitrapony amin'ny alalan'ny teniny. Araky ny fandaharana litorjika amin'izao Alahady faha 25 mandavantaona izao ny tenin'Andriamanitra dia marina araky ny lazaintsika matetika tsy misy tenin'Andriamanitra manokana fa natokana ho an'ny rehetra ny tenin'Andriamanitra fa kosa ny evanjely androany

Vakiteny I : Iz. 55, 6-9
Tononkira : Salamo 144
Vakiteny II : Fil. 1, 20d-24. 27a
Evanjely : Mt. 20, 1-16a

mampisongadina ny toetra anankiray hivelomantsika ny maha Kristianina antsika mba ho Kristy mpiara-belona amin'olona isika. Toetra mitodika manokana amin'ny lahika

Takin'ny maha lahika ny lahika ny hoe i Kristy mpiara-belona ka asaina isika mba hahay hampitraotra ny finoana sy ny fiainana andavanandro . Ny fanoharana ataon'i Jesoa androany ao amin'ny evanjely dia mampibaribary an'izay toetra Kristianina izay toe-panahy Kristianina hahatonga antsika ho Kristy mpiara-belona amin'olona.

Ny fampianarana voalohany ambaran'i Jesoa antsika dia ny mba ho voalohany amin'izay rehetra iandreketana, tsy hipetrapetraka fa tena miasa tokoa. Asainy isika na amin'ny ora fahafiry na amin'ny ora fahafiry, na aiza na aiza dia asain'i Kristy hiasa izany hoe hampamokatra ny fanjakan'Andriamanitra. Izany no fanirahana atao ho antsika mianakavy fa indrindra isika tanora mba ho taranaka mpanorina sy mamokatra voatsara. Voalaza ao amin'ny taratasy pastôraly farany teo koa fa ny volana oktobra ho avy izao ny anombohantsika ny asa pastôraly, anombohantsika izany ny fanirahana antsika rehetra mba hampamokatra ny fiainantsika amin'ny fitoriana ny vaovao mahafaly.

Ny fanoharana ataon'i Jesoa io dia tsy misy ora na taona fa isika vita batemy rehetra fa indrindra isika apôstôly lahika rehetra ary indrindra tsy misy resaka tambina na resaka karama fa irahina isika na amin'ny ora voalohany, na amin'ny ora fahasivy. Ao anatin'ny fivelomanana izay iraka izay no hanamasinantsika ny fiainana. Manana Modely isika dia Victoire sy Lucien Botovasoa.

Ny fampianarana faharoa dia tsy hoe tombotsoa na ny karama no andrasantsika fa ny tian'andriamanitra dia isika hiara-hiasa aminy ary raha manao izany isika dia mamokatra be. Raha manao ny asan'Andriamanitra isika dia Andriamanitra hanao ny asantsika araka ny voalaza matetika amintsika. Izany no vokatry lehibe, raha izy Andriamanitra no manao ny asantsika dia mahatoky ny saintsika fa hahazo vokatry sarobidy sy vokatry tsara ka hihavao sy hihalavorary tokoa ny fiainantsika.

Matoa isika tsy mamokatra dia satria tsy manao ny asan'Andriamanitra, izany no tiako ampitaina amintsika amin'izao Alahady faha 25 mandavantaona izao

Raha maniraka antsika tokoa Andriamanitra ary manasa antsika hiasa na amin'ny fotoana fahafiry, tsy misy fetra, ny tiany ambara dia ny hanatanteraka ny sitrapony isika, aoka isika hanao ny asan'Andriamanitra dia izy hanao ny asantsika.

Araky ny hafatr'Izaia mpaminany amin'ny vakiteny voalohany ; aoka isika hahay hananararaotra izao fotoana izao, hahay hivelona ny maha kristianina antsika ka hahatonga antsika ho Kristy mpiara-belona, "*Miantsoa Azy dieny mbola akaiky Izy. Aoka ny ratsy fanahy hiala amin'ny lalany, ary ny meloka, amin'ny heviny; ka hiverina amin'ny Tompo izy, dia hamindràny fo*"

Araraoty ry Kristianina havana izao fotoana izao mba hialantsika amin'ny toetra ratsy izay manapotika ny fiainantsika, aoka ho taranaka mamokatra isika, mamokatra voa tsara, aoka ho taranaka manorina Eglizy isika. Milaza i Jesoa ao amin'ny Evanjely hoe ny fihevitro tsy fihevitreo : aza ny hevitr'izao tontolo izao no entintsika miasa fa ny hevitr'Andriamanitra.

Masindahy Paoly ao amin'ny taratasy ho an'ny Filipianina mananatra antsika tokoa sy manome ohatra velona ho antsika : " *Homem-boninahitra amin'ny tenako i Kristy, na velona aho na maty. Satria raha ny amiko, dia i Kristy no ahavelomako, ary ny fahafatesana no ahazoako tombony*" Izany no maha Kristianina antsika satria mitondra anaran'i Kristy ka aoka ho izy no mamelona antsika ary amin'izay isika na amin'ny fotoana inona na amin'ny toerana aiza dia miasa ho an'ny fanitarana ny fanjakan'Andriamanitra. Raha manao ny asan'Andriamanitra isika dia hamokatra tokoa satria Andriamanitra no miasa ho antsika.

Ry Jesoa Tompo ô, vitsy ny mpiasa eo amin'ny sahanao ka tsy mitsahatra izahay ny mivavaka mba hanirahanao mpiasa ny sahanao, mivavaka koa izahay ho an'ireo efa am-perinasa nefa misedra zavatra maro , enga anie ny fahasovan'ao sy ny fanahinao masina hankahery ireo izay miasa amin'ny toerana izay sarotra. Ampio izy ireo ry Jesoa Kristy zokinay ô. Enga anie ny asa ataonay mba hamokatra araka ny sitrakao ary tsy ho kivy izahay eo amin'ny fanatanterahana ny asa izany ary vonona mandrakariva tsy hanana fahalemena fa hanana fankaherezana ka hiroso hahatakatra mandrakariva ny hevitrao. Ary izany hevitrao izany tokoa no entinay manatanteraka ny asa hanirahanao anay ka amin'izay dia hahay hampitraotra ny finoana sy ny fiainana andavanandro izahay. Amen

Mompera Arserveka Mgr Benjamin Ramaroson